


## FASNACHTSGESELLSCHAFT



BASEL

STAMM

GEGR. 1955

### Fasnacht 2006

## EGO

### numme mir zelle, alli andere hän nyt z welle

Was zelle hitte no die ideelle Wärt?  
Was zellt no d Gmainsamkeit und s Soziaali?  
Wär het no Sinn fir Huus und Härd?  
Hit zellt doch numme Ains, dasch s Radikaali!  
Mit Egoismus bringsch s zue Macht und Gäld  
Mit Ellebeegle kunnsch vyyl wyter  
Ruggsicht zellt nyt me uf däre Wält  
wär Aastand zaigt, fir dä stoots schyter!  
Ganz noonem Motto *jetz kumm ych*,  
drängt Jeede sich hit fiire  
Wär am maischte dränglet dä wird ryych  
wär nit, blybbt vor dr Diire.  
Legsch uff Sorgfalt und Erziehig Wärt,  
bisch pinggtlig, heeflig, zaigsch Respäggt,  
bisch doo dermit uff em falsche Märt  
denn elai dr Egoismus isch perfäggt.  
Die Groosse makes schliesslig vor  
und zaigen ys woos duure goot,  
me liegt wie druggt und glaubt s syg woor  
will s eso im Ego-Credo stoot.  
An schlächte Byspyyl duets nid fääle  
si wärde dääglig in dr Zytig bresentiert  
denn nur wär d Macht kaa zämmestääle  
wird vo de Meedie no bremiert.  
Dr Ego-Kampf ums dytschi Kanzleramt  
isch fascht scho Oskar-wirdig  
do wärde geegesytig d Kepf ygrammt  
doch s Resultaat blyybt schwach und dirftig.  
Wenn Ego-Macht und Ego-Sucht  
sich so radikaal mit Macht duet paare  
denn ergryffe d Wäaler vor dr Urne d Flucht  
soone Kanzler-Waal kennt me drum spaare.  
Duet Röschenz sich geege Rom erheebe  
und toobt e Kleeruskampf zwische zwai Stuure  
so duet das beidsyts zwor dr Ego heebe  
doch gits kai Gwinner hinter Kirchemuure.  
Wenn s Radikaali gilt statt Toleranz  
und Stuurhait herrscht statt Diskussioon  
denn gränzt das beidsyts scho an Arroganz  
zum Schluss blybbt numme Spott und Hoon.  
Es duet dr Bundesroot uus Aigenutz  
dr Swisscom d Fliigel stutze  
derby goots numme um dr aige Stutz  
und das duet ganz im Blocher nutze.  
Au dr Finanzchef Merz het Gryyde gfrässe  
und dänggt numme no an syni Stitz  
und s Gmainwool duet äär glatt vergässe  
unseri Konkordanzregierig isch hald e Witz.  
Schynts wott äär s Fimferli abschaffe,

das koschti zvyyl und syg nyt wärt,  
me wurd gscheiter däm sy Daaggäld straffe  
denn au e Fimfer het sy Märt.  
Kuum sait in Basel dr Jögge Schild  
är spanyfli uff en Olympisch Droon  
und syg drum uff e Regierigssitz nimm wild  
äär spiili dert dr Pausegloon,  
do drängle sich scho Gass und Malama  
mit spitze Ellebeege fiire  
und schreye luut: jetz sin mir draa -  
doch d Saski Frei wyyst sy vor d Diire.  
Au im Baudep gits so Egoische  
wo iir Ego-Fyyling zaige mien  
und bi de Trottoir-Baize uusemische  
statt Blastigg gilt jetz Holz und Grien.  
Im Ego-Ospel vo dr UBS  
sitzt s Portfeuille neecher als sy Härz  
äär verlosst im Millionääre-Stress  
drumm d Styrrhell Basel ooni Schmärz  
und ziiglet samt sym neye Schwarm  
in Kanton Schwyz zum halbe Bryys  
denn rych blybht rych und arm blybt arm,  
das Verhalte isch doch eender myys.  
Au d Frau Esther Ge mit iirem Hund  
losst eebefalls dr Ego bligge  
und behauptet iire Chess syg brav und gsund  
bi de andere Köter wurd nid tigge.  
Doch fir aimool gilt jetz Gsetz vor Gäld  
dä Kampfhund mues drotz allem wyche  
und dr braavi Bürger verseent sich mit dr Wält,  
dä Machtkampf gwinne dasmool nid die Ryche.  
S Theater Basel macht uff radikaal  
und will umsverregge nid mee spaare  
zwoor spiilt me vor halbläärem Saal  
und haltet d Bsuecher so zum Naare,  
derby wärs Spaare gar kai Sach  
und s Bütschee wurd lengschtens länge  
mir hänn schon e Theater unter em Roothuusdach,  
s Theater sälber kennt me spränge.  
Me gseets, die radikaali Egomanie  
nimmt zwyyfelhafti Formen aa  
wenn jede maint är syg e Scheny  
denn mälde mir Bedänggen aa.  
Doch aimool im Joor leen mir dr Ego gälte  
und dien unsere Fasnachts-Ego zelebriere  
denn herrsche radikali Ego-Fasnachtswälte  
wo mir uns stuur dien brofiliere.  
Drum setze mir Muggen e Fanaal  
und dien unsere Fasnachts-Ego lääbe  
denn *Le Carnaval - c'est radical*  
do isch fir aimool dr Ego nid dernääbe!

D Ladärneusstellig isch uus carnevalistisch-  
egoistische Grind uff em Minschterblatz und d  
Waage- und Reggwisyte-Uusstellig bi dr Kasäärne  
vom Mäntig Zoobe bis am Mittwuch demorge.

[www.muggedaetscher.ch](http://www.muggedaetscher.ch)